



**Rabu, 06 Juli 2022**  
**Ogen: Kuan-Kuanen 21:20**



**Pentar Ngaturken Keuangan**



Management" e me cara ngaturken sada dahin segelah banci ndatken ulih si mehuli. "Management" perlu bas kerina dampar kegeluhen, umpamana bas pengaturen perduiten. Siakui maka rejekita la gel-gel. Wari enda mbue dat rejeki kita, wari pepagi sitik ngenca janah banci ka nge kedun la lit. Guna si e me perlu kel pentar kita ngaturken si lit e alu payo. Bas kitab Pengerana ikataken kerina erpaksa-paksa

Uga dage carana segelah bas kerina paksa-paksa la kita ketunduken? Carana enggo me sieteh e me terbeluh makekenca.

Bas kitab si tuliskan raja Salomo e me kitab Kuan-kuanen ikataken mana "kalak pentar tetap bayak dengen nggeluh i bas kemewahen, tapi kalak bodoh ikerikenna duit si mbaru alokenna". Kerina kita ersura-sura segelah la mesera baban geluhta, erdandanken si e perlu pentar. Bas paksa melala ulih pencarinta la e dalanna kita erfoya-foya alu ngataken wari pepagi pe lit denga nge duitku. Entah wari pepagi pagi kalah iukurken. Sieteh maka ise pe la metehsa kai si jadi kerna wari pepagi. Iajari me kita gelah pentar. Rejeki sialoken kita wari enda sipakekenlah siseperluna sue ras keperlun geluh si lit. La matata penggurunta entah sura-suranta saja, tapi siukuri lebe kai nge si jadi kebutuhen si terpentingna si la banci la lit, e lah lebe siutamaken. Reh ulina ka adi sibahan tabungenta, sabap banci sipake kune lit kebutuhen mendesak bas geluhta.

Moria e me bendahara bas jabu, kepentaren bendahara bas ngaturken perduiten mbelin kel ngaruhna ku bas kesejahtraan jabu. Terlebih-lebih bas ncukupi keperlun persekolahen anak-anakta, niarapken peran penting bas Moria nari segelah la ketunduken janah anak-anakta pe banci tetap ukurna bas persekolahen. Janah ibabo si e kerina tetapliah tertande man Tuhan, segelah hikmat ras kepentaren Dibata e singajar-ngajari kita.